

Republika Srbija
**MINISTARSTVO PROSVJETE,
NAUKE I TEHNOLOŠKOG RAZVOJA
KABINET MINISTRA**

Broj: 601-00-9/1/2020-01

Datum: 16.03.2020. godine

Beograd

Nemanjina 22-26

**RODITELJIMA/ZAKONSKIM ZASTUPNICIMA UČENIKA
OSNOVNIH I SREDNJIH ŠKOLA**

Poštovani,

Obavještavamo vas da je Vlada Republike Srbije odlučila da se, zbog trenutne epidemiološke situacije u zemlji, privremeno obustavi neposredni obrazovno-odgojni rad u osnovnim i srednjim školama na teritoriji Republike Srbije. U cilju ostvarivanja prava učenika na obrazovanje, Ministarstvo prosvjete, nauke i tehnološkog razvoja pripremilo je operativni plan za nastavak rada škola u otežanim uvjetima, kroz ostvarivanje obrazovno-odgojnog rada učenjem na daljinu, s obzirom na to da privremeno obustavljanje neposredne nastave u školama ne znači i obustavljanje obrazovno-odgojnog rada sa učenicima.

Početak realizacije obrazovno-odgojnog rada učenjem na daljinu je 17. mart 2020. godine.

Ostvarivanje obrazovno-odgojnog rada predviđeno je kroz različite načine i pristupe u ostvarivanju komunikacije sa učenicima i roditeljima/zakonskim zastupnicima (u daljem tekstu: roditelji), pri čemu će se voditi računa o ukupnim ljudskim i tehničkim resursima škola, kao i tehničkim kapacitetima porodica učenika.

U organiziranom učenju na daljinu koje obezbjeđuje Ministarstvo, fokus je na programskim sadržajima općeobrazovnih i stručnih predmeta sa najvećim fondom časova. Osim toga, škole su u obavezi da, u skladu sa sopstvenim resursima za podršku u učenju na daljinu i uz korištenje dostupnih platformi za učenje, osmisle načine za ostvarivanje sadržaja i u svim drugim predmetima i programima, na osnovu propisanog plana i programa nastave i učenja.

U cilju ostvarivanja jednakih prava na obrazovanje sve djece, škole su u obavezi da, kada ne postoji mogućnost uspostavljanja komunikacije sa učenicima uz upotrebu informaciono-komunikacionih tehnologija, iznađu alternativne načine u pružanju podrške u učenju, vodeći računa o svim preporukama za prevenciju širenja virusa COVID-19, imajući u vidu, prije svega, učenike koji dolaze iz porodica niskog socio-ekonomskog statusa, kao i sve ostale učenike kojima nisu na raspolaganju elektronski vidovi komunikacije i drugi savremeni komunikacioni resursi (npr. obezbjeđivanjem

štampanog materijala za rad ili uputstva za učenje koje razredne starješine uručuju roditeljima).

Za **učenike osnovne škole**, Ministarstvo prosvjete, nauke i tehnološkog razvoja je pripremio edukativne sadržaje za učenje na daljinu, koji će biti emitirani na Radio televiziji Srbije, Kanal 3.

Šest dana u sedmici, počev od utorka 17. marta 2020. godine, od 8.00 sati bit će emitirane nastavne jedinice općeobrazovnih predmeta, po rasporedu koji će biti dostupan preko sajta škole, sajta ministarstva, kao i na www.rasporednastave.gov.rs. Također, raspored emitiranja će biti istaknut i na mjestima za oglašavanje u samoj školi (ulaz škole, spoljašnja oglasna tabla).

Za sve učenike od 1. do 7. razreda emitirat će se obrazovni sadržaji u blokovima od po dva časa dnevno. Za učenike 8. razreda emitirat će se edukativni sadržaji u blokovima od po tri časa dnevno, od kojih će dva uvijek biti srpski jezik i matematika, a treći čas je jedan od predmeta koji se polažu na završnom ispitu. Svi emitirani sadržaji će od sljedećeg dana biti dostupni za neograničeni broj pregleda na platformi RTS Planeta. Operateri neće naplaćivati protok i prijenos podataka za navedene edukativne sadržaje (besplatni internet minuti).

Ostali edukativni sadržaji za učenje i uputstva za rad za emitirane časove, kao i za predmete koji nisu obuhvaćeni TV emitiranjem, bit će prosljeđeni učenicima ili roditeljima učenika preko Viber grupa ili elektronske pošte od strane odjeljenkog starješine ili predmetnog nastavnika (npr. upućivanje na tekstove u udžbenicima koje treba pročitati, na linkove na kojima se nalaze prezentacije i filmovi, upućivanje na zadatke za vježbanje, uputstva za izradu domaćeg zadatka i sl.).

U pripremi su i časovi na jezicima nacionalnih manjina (predmet- maternji jezik od 1. do 4. razreda osnovne škole) koji će biti emitirani na RTV 2, ali i na nekim lokalnim i privatnim televizijama. Također, na platformi RTS Planeta za učenike pripadnike nacionalnih manjina koji u cjelosti pohađaju nastavu na maternjem jeziku, bit će dostupni i drugi digitalni sadržaji, kao i snimci časova. Nedostajuće sadržaje na maternjem jeziku, učenici mogu pratiti na srpskom jeziku preko kanala RTS 3 i RTS Planete. O početku emitiranja i postavljanja sadržaja, škole a na taj način i roditelji, bit će obaviješteni posredstvom sajta ministarstva i sajtova nacionalnih savjeta nacionalnih manjina. Nastavnici koji ostvaruju nastavu na jeziku nacionalne manjine također su u obavezi da pruže dodatnu podršku u učenju, putem svih raspoloživih vidova komunikacije.

Za **učenike srednje škole**, predavanja iz općeobrazovnih predmeta i pojedinih stručnih predmeta bit će dostupna preko platforme RTS Planeta. Obaveza srednje škole je da na svom sajtu postavi baner sa svim linkovima na kojima se može pristupiti lekcijama i platformama za učenje.

Za učenike kojima je potreban strukturiran individualiziran pristup u radu, odnosno prilagođavanje u okviru individualnog obrazovnog plana (IOP), IOP-1, IOP-2 i IOP-3 , nastavnici će pripremiti posebne materijale za učenje i učiniti ih dostupnim učenicima na način koji dogovore sa njihovim roditeljima.

Nastavnicima i učenicima osnovne i srednje škole na raspolaganju je veliki broj onlajn platformi (Viber, Zoom, Microsoft Teams), kao i nacionalna platforma za onlajn učenje *Moja škola*. Njihovim korištenjem, nastavnici i učenici bit će u situaciji da ostvare interakciju i razmjenu materijala u funkciji savladavanja programskih sadržaja. Uputstva i pedagoške preporuke za korištenje ovih platformi nalaze se na internet stranici www.rasporednastave.gov.rs i njihovo korištenje je besplatno. Na zvaničnoj internet strani Ministarstva bit će postavljena odgovarajuća uputstva, kao i obavještenja o datumima u vezi sa početkom njihovog funkcioniranja.

U najboljem interesu učenika, njihovog razvoja i obrazovanja, a u cilju uspješnog završetka tekuće školske godine, mole se roditelji da odgovorno i u skladu sa svojim mogućnostima kontroliraju proces učenja od kuće i podstiču učenike na redovnost u radu. Svrha dostupnosti sadržaja za učenje je ostvarivanje samog procesa učenja, koji će se zbog vanrednih okolnosti nastaviti kod kuće, uz podršku nastavnika, ali i samih roditelja. Učenici će dobijati uputstva za vježbanje, izradu domaćih zadataka, pisanje eseja, izradu prezentacija i drugih produkata koje će sami ili uz pomoć roditelja, zavisno od uzrasta i digitalnih kompetencija, dostavljati nastavnicima putem mejla ili druge obrazovne platforme i to za sve predmete, čime će se obezbijediti kontinuitet u učenju, praćenje napredovanja i mogućnost ocjenjivanja. U prilog ovome govori i obaveza nastavnika da sve realizirane nastavne jedinice evidentiraju u elektronskom dnevniku i/ili u drugim vidovima pedagoške dokumentacije. Po normaliziranju uvjeta i po povratku u učionice, sve kvalitetne formativne ocjene i uvidi nastavnika mogu biti značajno iskorišteni za sumativno ocjenjivanje na kraju nastavne godine.

Sve su ovo preduvjeti za osiguranje završetka školske godine i nastavak školovanja. Samo uz razumijevanje interesa učenika i podršku roditelja, ovu obavezu možemo zajednički uspješno realizirati .

Posredstvom škola roditelji će dobijati i druga uputstva od nadležnih organa, vezano za epidemiološku situaciju, ali i korisne savjete kao vid psihosocijalne pomoći u vanrednim okolnostima.

Dodatne informacije u vezi sa učenjem na daljinu, kao vidom podrške nastavi, roditelji mogu dobiti pozivom na broj telefona 011/735 05 57.

Zahvaljujemo na razumijevanju i saradnji,

MINISTAR
Mladen Šarčević